



Naalakkersuisooqatigiin- nissamut isumaqatigiissut 2016 – 2018



**Naligiinneq
Toqqissisimaneq
Ineriartorneq**

2016-imiit 2018-imut Naalackersuisooqatigiinnissamut isumaqatigiissut nutaaq

Kalaallit Nunaat allanngortinneqarsinnaanngitsumik namminiivikkiartorpoq aammalu taamatut ingerlaneq naalackersuinikkut patajaatsumik ingerlatsiviusariaqarpoq, nunalu tamakkerlugu ataatsimoornissaq pisariaqalerluni. Namminiillivinnissap tungaanut sulineq aatsaat pitsaanerpaamik anguneqarsinnaavoq sapinngisamik siammasinnerpaamik katersuuffiunerpaasumillu naalackersuisooqatigiinnikkut. Tamanna aallaavigalugu Siumut, Inuit Ataqatigiit aammalu Partii Naleraq isumaqatigiipput qinigaaffiup sinnerani suleqatigiinniarlutik, tassungalu atatillugu makku isumaqatigiissutigineqarput:

Nunatsinni inuiaqatigiit nalinginnaasumik killiffiat nassuerutigalugu atsiortut isumaqatigiissutigaa Inatsisartuni Naalackersuisunilu politikkikkut suleqatigiinneq **patajaannerusumik** toqqammaveqassasoq inuiaqatigiinnilu **naligiinnerulernermik** pilersitsisoqartariaqartoq, taamatullu aaqqiissutaasut **patajaatsumik** sinaakkusersorneqassasut.

Atsiortut isumaqatigiipput qaammatini ukiunilu tulluuttuni innuttaasunut inuiaqatigiinnullu iluaqutaasumik attanneqarsinnaasumik aaqqiisoqartariaqartoq.

Atsiortut isumaqatigiipput inuiaqatigiit inuuniarnikkut atugaat **naligiinnerusoq** anguniarlugu sulisoqassasoq, taamaasilluni atukkat naligiinnerulerlutik, sumi najugaqarneq apeqqutaatinnagu. Taamaasillugu atsiortut inuiaqatigiinni sutigut tamatigut **nalingiinnginnerup** akiorneqarnissaa kissaatigaat.

Naalackersuisooqatigiillersut inuiaqatigiinnut katersuuffiunissartik kissaatigaat. Atsiortut tamat oqartussaaqataanerit illersorusuppaat innuttaasut sutigut tamatigut akuutinneqarnerisigut.

Iluarsartuussinerit pisariaqartut

Atsiortut isumaqatigiissutigaa akileraartarnerup, ineqarnerup aammalu pisortanit ikiorsiissuteqartarnerup tungaatigut iluarsartuussinissat pisariaqartinneqartut pillugit ersarissumik sinaakkusersuisoqassasoq, iluarsartuussinernilu pineqartuni naligiinnerusumik anguniagaqarneq tunngaviusasooq.

Kommuunit

Kommunalbestyrelsit kalluarneqartut qanimut suleqatigalugit attanneqarsinnaasumik aaqqiissuteqartoqassaaq Qaasuitsup Kommuniata avinneqarnissaa pillugu. Taassuma saniatigut nunaqarfinnut aqutsisut piginnaasaqalivitsinneqassapput aalajangiisnaassuseqalerlutik aammalu aningaasatigut iliuuseqarsinnaalerlutik. Taassuma saniatigut najukkami siunnersuisooqatigiinnik imaluunniit assigisaanik pisariaqartitsineq naapertorlugu pilersitsisoqassaaq.

Angallanneq

Atsiortut isumaqatigiissutigaa innuttaasunik angallannerup tungaatigut kiffartuussinissamik isumaqatigiissusiortoqarnerani innuttaasut atugaannik ajorseriartortitsisoqassanngitsooq. Taamaattumik kommuunit naammagisnaasaannik isumaqatigiissusiortoqassaaq.

Nunaqarfiit isorliunerusullu

Atsiortut isumaqatigiipput nunaqarfiit isorliunerusullu pillugit pisorta qarfirmik pilersitsisoqassasoq oqartussaaffimmi tassani suliassat nassuerutigalugit. Atortorissaarusornermi, attaveqarnermi, nukissiuuteqarnermi peqqinnissaqarnikkullu iliuusissat pilersaarusiorneqassapput. Taassuma saniatigut nunaqarfinni nukissiuutinik mingutsitsinngitsunik ingerlaavartumik atuisoqalernissaa sulissutigineqassaaq.

Nunap immikkoortuinik ineriartortitsineq

Atsiortut isumaqatigiissutigaaq nunap immikkoortortakkaartumik nunattalu immikkoortuinut tulluurtumik aammalu naligiinnerusumik ineriartortinneqassasut, ingammik siunnersuisarnerup aammalu inuussutissarsiornikkut ineriartortitsinerup tungaatigut. Imminut pilersorsinnaanerup siuarsarnissaa pillugu nuna tamakkerlugu iliuusissanik pilersaarusiorneqassaaq.

Meeqqat ilaqutariillu

Atsiortut isumaqatigiipput meeqqat inuussuttuaqqallu pillugit nuna tamakkerlugu iliuusissanik pilersaarusiorneqassasoq. Taassuma saniatigut MIO-mut ilisimasanik katersinissamut atorneqartussanik aningaasanik amerlanerusunik aningaasaliisoqassaaq.

Meeqqat atuarfiat

Atsiortut isumaqatigiipput Atuarfitsialammi atuartsinerup malunnaatilimmik pitsanngortinneqassasoq. Ilanngullugu meeqqat atuarfii eqqarsaatigalugit aserfallatsaaliineq iluarsartuussinerlu pisariaqartinneqaqisoq qulakkeerniarneqassaaq Sanaartornermut Iluarsartuussinermullu Aningaasateqarfimmi aningaasaliissutit amerlanerusut timitalerneqartarnerisigut.

Tasiilami ingerlariaqqiffiusumik ilinniartitaaneq

Atsiortut isumaqatigiissutigaaq qinigaaffiup iluani Tasiilami ingerlariaqqiffiusumik ilinniartitaanikkut pilersitsisoqarsinnaanersoq misissussallugu.

Pisuussutininik uumassusilinnik aqutsinerup piujuartitsinissamik toqqammaveqarnissaa

Atsiortut isumaqatigiissutigaaq pisuussutininik uumassusilinnik aqutsinerup piujuartitsinissamik toqqammaveqarnera ersarissumik sinaakkusersorneqassasoq.

Ersarissumik nuna tamakkerlugu silaannaap allanngoriartornerani anguniagaqarneq

Atsiortut isumaqatigiissutigaaq ersarissumik silaannaap allanngoriartorneranut akiuinissamut anguniagaqartoqarnissaa. Tassunga ilanngullugu Parisimi isumaqatigiissummut peqataanissamut taassumalu aningaasatigut sunniutigisassai pillugit periarfissat misissorneqassapput.

Naligiinneq - Toqqissisimaneq – Ineriartorneq

Siumut, Inuit Ataqatigiit aamma Partii Naleraq matumuuna qinigaaffiup sinnerani naalackersuisooqatigiinnissamik isumaqatigiissuteqarput.

Suleqatigiinnermi pingaartillugu isumaqatigiissutaavoq nunarput inuilu pillugit pitsaasumik tatiginartumik, tutsuiginartumik innuttaasullu qitiutillugit Inatsisartuni Naalackersuisunilu sullissinissaq.

Naalackersuisooqatigiilersut isumaqatigiissutigaat inuiaqatigiit ineriartornerat nunarsuarmioqatigiinnermilu nukittuumik inissisimanagerat annerlerseqqullugu siunnerfeqaqatigiittoqassasoq Inatsisartuniinnaangitsoq Naalackersuisuniinnaangitsorlu, aammali inuiaqatigiinni tamani suleqatigiinnerup siuarsaavigineqarnissaa ilanngullugu sulissutigineqassasoq.

Partiit naalackersuisooqatigiilersut isumaqatigiipput iluarsartuussinertigut sulissutigineqassasoq innuttaasut atugarisaasa pitsanngorsarnissaat aammalu minnerunngitsumik aningaasarsiornikkut siuariartortitsisoqarnissaa, taamaaliornikkut suliffissat nutaat pilersinneqarsinnaassammata sulisinnaasullu amerlanerusut sulilersinneqarlutik.

Aalisarnermi, takornariaqarnermi, nunami suliffeqarfinni aammalu sanaartornikkut suliani siuariartortitsisoqarnissaa sulissutigineqassaaq. Partiit naalackersuisooqatigiit nutaaliornermi, nassaarniarnermi aammalu suliffeqarfinnik pilersitsiniarnermi pitsaasumik sinaakkusersuiniarput. Taamatuttaaq inuussutissarsiutini tamani aningaasat kaaviiartinneqartut amerlisarneqartuarnissaat aammalu patajaatumik aningaasatigut toqqammaveqarnissaat sulissutigineqassaaq.

Aalisarnermi suliffissuaqarnermilu, aatsitassarsiornermi, takornariaqarnermi aammalu nunami suliffeqarfinni allani, illuliornermi sanaartornermilu aningaasarsiorfissat suliffissallu annertusarneqassapput. Taamatuttaaq inuussutissarsiutini pioreersuni aningaasat kaaviiartinneqartut amerlanerulernissaat sulissutigineqassaaq.

Partiit naalackersuisooqatigiilersut isumaqatigiissutigaat sutigut tamatigut anguniarneqassasoq nunatsinni innuttaasut sulisinnaassusillit sapinngisamik tamarmik suliffissaqarlutillu imminut pilersornissaminnut periarfissarissaartinneqarnissaat. Tamanna ilaatigut pissaq illuliornermi sanaartornermilu suliniutit aallartisarneqarnerisigut aammalu inuusuttut amerlanerusut ilinniagaqalernerisigut suliffissaqartinneqalernerisigulluunniit.

Inuiaqatigiit aqqissuussaanagerat patajaannerusunngortinniarlugu iluarsaaqqinnerit assigiinngitsut ingerlanneqarnissaat partiit naalackersuisooqatigiilersut isumaqatigiissutigaat. Inuiaqatigiinni aqqissugaanitsinni annertuumik ajornartorsiuteqarpugut, taakkulu isumaginninnikkut ikiorsiissuteqartarnermi, akileraartarnermi, ineqarnermi inuussutissarsiornermilu iluarsartuusseqqinnertigut aaqqiivigineqarnissaat siunnerfilimmik sulissutigineqassaaq.

Kommunit kattussuunneqarnerat nalilersorneqassaaq, tassanilu kommunit angissusaat nutaamik nalilersorneqarluni. Innuttaasut kiffartuunneqarnerat, aalajangeeqataasinnaanerat akuutinneqarnerallu nalilersuinermi pingaaruteqarluinnartutut inissisimapput.

Inuussutissarsiutitigut siursaaneq suliarineqassaaq aalisarnermi, aatsitassarsiornermi, takornariartitsinermi sanaartornikkullu isertitat annertunerulersinneqarnerisigut. Tamakku anguneqassapata aningaasalersuisoqartariaqarpoq aammalu inuussutissarsiortut pitsaanagerusumik atugassa-

qartinneqartariaqarlutik, taamaaliornikkut inuit amerlanerusut imminut pilersorsinnaanerit periarfissinneqassamat.

Kalaallit Nunaat aningaasarsiorinnikkut imminut napatittoq pilersinniarlugu naalakkersuisooqatigiinneq ingerlanneqassaaq.

Taamaammatt naalakkersuisooqatigiilersut suliaasaqarfinni assigiinngitsuni makku pingaartillugit sulissutiginiarpaat:

Tutsuiginartumik naalakkersuisooqatigiinneq

Naalakkersuisooqatigiit isumaqatigiissutigaaq naalakkersuisooqatigiinneq unneqqarissumik, tatigeqatigiilluni illuatungeriillu imminnut ilumoorfigeqatigiinnerannik tunngaveqassasoq.

Isumaqatigiissutigineqarpoq ammasumik aqutsineq toqqammavigalugu nunarput naalakkersuinikkut aqunneqassasoq, taamaammallu pisortani atorfiit qaffasinnerpaat inuttalersorneqartarnerini periutsit ammasumik aqutsinermut naleqqussarlugit nutarterneqassapput.

Nunarput inuulu nunarsuarmioqataaannermillu aallaaveqartumik innuttaasut oqartussaaqataaannert akisussaaqataaannerrallu ataqqillugu aqunneqassaaq, innuttaasut taakkulu pisariaqartitaat aallaavigalugit ingerlatsineq naligiimmillu atugassaqartitsineq sulissutigissallugu. Taamaammatt naalakkersuisooqatigiinnermi siunnerfiit isumaqatigiissutigineqartut piviusunngortinneqartarnissaannut ataqatigiissaarisartussanik naalakkersuisooqatigiit pilersitsissasut isumaqatigiissutigineqarpoq.

Inuit oqartussaaqataaannert ataqqillugu nunattalu naapertuunnerusumik sinniiseqartarnissaa qulakkeerumallugu, naalakkersuisooqatigiit isumaqatigiissutigaaq Inatsisartunut qinerseriaaseq nalilersoqqissaarneqassasoq.

Partiit naalakkersuisooqatigiilersut nunatsinnut inuinnuullu sutigut tamatigut ilumoorlutik sullissinissartik pingaarnarpaat.

Aningaasaqarneq akileraartarnerlu

Naalakkersuisooqatigiit isumaqatigiissutigaaq suliat tamarmik ingerlanneqassasut nunatta aningaasaqarnikkut imminut naptillernissaa siunertarlugu – suliniutigineqartullu sunniuteqarlunnissaat qulakkeerniarlugu ataqatigiissaarneqassasut.

Pisortat sanaartornermut aningaasaliissutaat nunap immikkoortuinut aamma pisariaqartitsineq naapertorlugu siammarterneqassapput, sanaartornermilu akisussaaffimmik kommunitut nuusisoqarsinnaanera siunertarlugu misissueqqissaarnerit nalilersuinerillu suliarineqassapput.

Akileraartarnikkut naapertuilluartumik naligiissaarineq nalimmassaanerlu suliarineqassaaq, nunatta assigiiaarnerusumik ineriartornissaa qulakkeerumallugu.

Nunatta Karsianut missingersuutit eqqarsaatigalugit ukiuni suleqatigiiffiusuni ataatsimut isigalugu isertitat aningaasartuutillu sapinngisamik oqimaaqatigiittarnissaat siunnerfigineqarpoq.

Aningaasat pisissutaasinnaanerisa qaffasinnerpaaffianiitinnissaat aammalu aningaasat naleerukkiartortarnerisa appasinnerpaaffianiitinnissaat naalakkersuisooqatigiit anguniarpaat.

Nuna tamakkerlugu akileraarut qinigaaffimmi nikisinneqassanngilaq.

Sulinermut atatillugu ilanngaasat eqqunneqassaaq.

Isertitakinnerpaat aningaasatigut oqilisaaffigineqarsinnaaqqullugit inummut ilanngaasat qaffan-
neqarsinnaanera akileraartarnermut aaqqissuusseqqinnermut ilanngullugu nalilersorneqassaaq.

Piginneqatigiiffinnut akileraarutip appartinneqarsinnaanera pillugu misissuisoqassaaq, Kalaallit
Nunaata unammillersinnaanera, imminut pilersorsinnaaneq aammalu nalituunngortitsisarnerup
qaffassarneqarnissaa qulakkeerniarlugu.

Kalaallit Nunaata aamma Danmarkip akornanni aningaasat ingerlaarnerat pillugu nassuiaammik
suliaqartoqassaaq. Tassunga ilanngullugu Kalaallit Nunaanni namminerisamik aningaaserivili-
ortoqarsinnaaanersooq nalilerneqassaaq.

Naalakkersuisooqatigiit Danmarkimut saaffiginnissuteqassapput nunatsinni ineriartortitsiner-
mut aningaasaateqarfimmik pilersitseqatigiinnissaq siunertarlugu, nunatsinni sanaartugassanut
annertuunut imminullu akilersinnaanngortussanut tamanut aningaasalersuiffittut ator-
neqartussa-
mik.

Inuussutissarsiorneq

Naalakkersuisooqatigiit inuussutissarsiornermut siuarsaaneq ingerlanniarpaat nunatta aningaasa-
qarnikkut imminut napatillualernissaa siunertarlugu. Tamatumani inuussutissarsiornermi sukar-
suit sisamat ineriartortitsiviussapput: Aalisarneq Suliffissuaqarnerlu – Aatsitassarsiorneq – Takor-
nariaqarneq – Nunami suliffissat ilinniartitaanerlu kivitsisoralugit.

Nilammik, imermik aalisakkanik aammalu aatsitassanik avammut nioqquteqalernissamut taarsi-
gassarsinissamut, qularnaveeqqusiinissamut aningaasaliinissamullu periarfissat pitsanngorsarne-
qassapput.

Ineriartortitsiner-
mut pilersaarut aqutigalugu suliffeqarfiit aningaasaliisartullu pitsaanerumik
attanneqarsinnaasumillu sinaakkusersorneqassapput, ilinniagaqarsimassuseq qaffassarneqarluni,
pisortani sullissineq siunnerfilersorneqarluni aammalu inuit ataasiakkaat imminnut pilersorsin-
naanerat annertusarneqarluni.

Namminersorlutik Oqartussat pigisaat ingerlatseqatigiiffiit tamarmik nunatsinni inissimasunik
qullersaqarfeqalissasut piumaffigineqassapput. Aammalu ingerlatseqatigiiffinni pisortasut tamar-
mik nunatsinni najugaqartassasut akileraartussaataaassasullu piumaffigineqassapput.

Namminersorlutik Oqartussat ingerlatseqatigiiffiini siulersuisuni ilaasortat amerlanerussuteqartut
nunatsinneersuusassapput.

Aalisakkat nunatsinni tunisassiarineqartut ullumikkornit annertunerusumik naleqalersinneqarlutik tunisassiarineqartarnissaat aammalu atorluarneqarnerunissaat qulakkeerniarneqassaaq.

Aalisakkat nunatsinni nalituunngortinneqaratik piumasaqaatitaqanngitsumik avammut niuerutigineqartartut akitsuuserneqartalernissaat aqqissuunneqassaaq.

Nunami suliffissuit innaallagissamik, imermik kiassarnermillu atuinnermut akikillisaaffigineqartarnerat nunarput tamakkerlugu assigiimmik annertussusilerneqartassaaq.

Pisortat inuussutissarsiornikkut ingerlatseqatigiiffinnut akulerusimanagerat nalilersorneqassaaq. Qulakkeerneqassaaq innuttaasut kiffartuunneqarnerisa ajorseriaateqannginnissaat.

Suliffeqarfiit isumaginninnikkut annertunerusumik akisussaaqataalernissaat aqqutissarsiuunneqassaaq, taamatullu avatangiisit pillugit annertunerusumik anguniagaqartarnissaat sulissutigineqassalluni.

Suliffeqarfinnik nutaanik aallartitsiniarnermi aningaasatigut pisortaniit tapiiffigineqarnissamut periarfissat pitannngorsarneqassapput, aporfissaararpassuillu piarneqarnissaat naalackersuisooqatigiit sulissutigissavaat.

Nunami suliffissualiorniartoqartillugu innaallagissamut imermullu pisortat attaviliisinaanerat ersarissaaffigineqassaaq.

Naalackersuisooqatigiit siunniuppaat inuussutissalerinnermut oqartussaanagerup nunatsinnut nuunneqarnissaa piviusunngortinneqassasoq.

Ilinniartitaaneq

Naalackersuisooqatigiit anguniarpaat nunarput ilinniarsimassutsikkut imminut pilersorlunilu napatittoq:

Meeqqat atuarfiata, Atuarfitsialaap, nalilersorneqarnera naammassineqarpat naalackersuisooqatigiit meeqqat atuarfiani atuartitsinerup pitsannngorsarnissaa anguniarlugu immikkut iliuuseqassapput. Taamaaliornikkut sineriaq tamakkerlugu angusaqassutsikkut pitsaaneruserumik assigiinneruserumillu angusaqarfiusarnissaat qulakkerumallugu. Atuarfitsialammi inuunerissaarneq inerisaanerme pingaartillugu sulisoqassaaq.

Taamatuttaaq inuusuttut amerlaneruserut meeqqat atuarfiiniit soraarummeereernerme kingorna ilinniagaqaaqittarnissaat naalackersuisooqatigiit qulakkeerniarpaat.

Atuarfitsialammi 11. klassersinnaaneq periarfissaalissaaq.

Inuussutissarsiutigisinnaasaminnik ilinniarsimasut qaffassaaniarnerminnut atatillugu ilinniarsimasaminnut attuumassuteqartitaminnik ilinnialerniartut periarfissaqartinneqassapput.

Inuusuttut nunatsinni nunaniluunniit allani ilinniakkamik ingerlatseruseruttut namminneq toqqaasinnaanissaminnut periarfissaat annertunerulersinneqassapput.

Nunatsinni ilinniartoqarfinni tamani internetimik akeqanngitsumik atuisinaannaanerat annertusarneqassaaq.

Kalaallisuinnaq oqaasillit ilinniarnissaminut periarfissaat annertusarneqassapput.

Inuussutissarsiutini suliasaqarfinnilu tamani pisortat namminersortullu suliffeqarfiutaanni suogaluartuni praktikkerfinnik ilinniartullu sungiusarfiinik amerlanerusunik pilersitsisoqassaaq.

Sineriak tamakkerlugu ilinniartut inissaannik amerlanerusunik sanaartortoqassaaq.

Atuarfinni ilinniartoqarfinnilu tamani atuartut ilinniartullu sumulluunniit tunngassuteqaraluarpat katsorsarneqarnissaminnik pisariaqartitsisut akeqanngitsumik katsorsarneqartalernissaat naalackersuisooqatigiit anguniarniarpaat.

Naqinnernik ilisarinnissinnaanngitsut eqqarsaatigalugit suliniutit annertusarnissaat naalackersuisooqatigiit isumaqatigiissutigaaq.

Alimasissumik atuartitsineq annertusarneqassaaq, ingammik nunaqarfinni.

Tasiilami nunap immikkoortuani ilinniarfimmik pilersitsisoqarsinnaaneranut periarfissat misissorneqassapput piviusunngortinneqarlutillu.

Ilinniarfeqarfinni ingerlariaqqiffiusuni ilinniusiat Nunatsinni pissutsinut tarrarsortut amerlanerulernissaat anguniarlugu naalackersuisooqatigiit suliniuteqassapput. Ilinniagaqassutsimik qaffassaaneq ilinniutit inuusuttut inuiaqatigiit inuuffigisaannut naleqqunnerusut atorlugit aallaaveqartariaqarmat.

Suliffeqarneq

Naalackersuisooqatigiit isumaqatigiipput suliffissaaleqineq annikinnerulersinniarlugu sulineq pingaarnerpaatinneqassasoq, matumanilu suliffeqarneq pillugu iliuusissatut pilersaarusiaq naapertorlugu suliat ingerlanneqassapput.

Avataaniit suliarortut nakkutigineqarnerulissapput tikisitat ikilisinniarlugit.

Kommunit suliffissarsiuussisarfiisa aammalu najukkami Majoriat akornanni pitsaannerusumik ataqatigiissaarisoqassaaq nukinnik pioreersunik atorluanaanikkut.

Inuusuttut 30-it inorlugit ukiullit suliffissaaleqisut akornanni amerlanerpaammata Naalackersuisooqatigiilersut isumaqatigiipput taakku pillugit immikkut suliniuteqarniarlutik inuusuttut unittoratik ilinniarfinnut ingerlaqqinnissaat aqutissiuunniarlugu aamma assassornermik piginnaaneqartut suliffeqalernissaat anguniarlugu sakkortusisamik suliniuteqarniarlutik. Tamatumani suliasami periarfissat assigiinngitsut Naalackersuisooqatigiit atorluassavaat, soorlu Nunatsinni højskolit pioreersut, Majoriat, inuusuttullu siornatigut kiffartuussisarnerannut assigusunik aqqqissuussisoqarnissaa Naalackersuisooqatigiit siunnerfigaat.

Umiarsuarni aqumiussatut Kalaallit ilinniarsimasut naalakkat aquttullu atorluarneqarta-riaqarput, taakku atorluarneqarpata Royal Arctic Line A/S-imi inuttarpassuit kaalaalinngorsarneqassapput.

Kilisaassuarni avataasiutini Kalaallit naalakkatut aquttutullu naammassereersimasut salliutillugit atorineqarnissaat sulissutigineqassaaq, taamaaliornikkut aningaasarpasuit nunanit allamiunit aqumiorineqartunit annissorineqartut nunatsinniilissammata, nunatta aningaasaqarniarneranut iluaqutaallutik.

Nunanit allaneersut sulisunut nunatsinnut suliarortunut sulisinissamut akuersissuteqartarneq sukateriffigineqarnissaa Naalakkersuisooqatigiit suliariniarpaat. Tassanilu avataaniit suliarortartut pillugit akuersissuteqartarnermi tunngaviusut pillugit aalajangersakkat allanngortinneqassapput. Qinnuteqaatillu nalilersuiffigineqarnerani kattuffiit susasaqartut peqataatinneqartarnissaat qulakkeerneqassaaq.

Pisortat suliffeqarfiutaanni sulisoqarnermut politikkiortoqassaaq, tamatumani ilanngullugit tikisitanik sulisoqarnermut tunngatillugu piumasaqaatissat erssarissut pingaaruteqarput.

Aalisarneq

Aalisarneq nunatta inuussutissarsiutaasa pingaarnersaraat aningaasanillu isaatitsissutit annersaralugu, taamaammatt aalisarnerup piujuaannartitsinermik aallaaveqartuarnissaa Naalakkersuisooqatigiit isumaqatigiissutigaaq.

Uumasunik ilisimatuut ilisimasaat aammalu aalisartut ilisimasaat naligiimmik toqqamvigineqartassapput, pisassiissutissatut siunnersuutit aalajangersarneqarnerini.

Imartani nunatta aningaasarsiorfigisinnaasaani aalisarnissamut periarfissat nalunaarsorneranni pingaaruteqarpoq Pinngortitaleriffimmut aningaasaliissutit ilaneqarnissaat, tassungalu atatillugu misissueqqaarnernut tamanut aalisartut aalajangeeqataanissamut periarfissaqartinneqarnissaat pisussaaffiliissutigineqassaaq.

Aalisakkat sapinngisamik annertunerpaamik nunatsinni nalituunngortinneqarlutillu annerpaamik tunisassiarineqartassapput, ilaatigut tulaassisusaataa neranut pisussaaffiliisarnikkut, taamaattoqartinnagulu tassunga naapertuuttumik akitsuusiisoqartassalluni.

Nunatsinni aalisakkanik tunisassiortut aalisarnermillu akuersissutinik pigisaqartut avammut niuerneranni akitut nalunaarsorneqartut nunarsuarmi niuernermi akigitat aallaavigalugit inissinneqartassapput.

Aalisarnermut inatsit naammassillugu suliarineqassaaq.

Aalisariutinik nutarterineq sukkanerusumik pisinnaaqqullugu inatsisitigut periarfissat eqaallisarneqarnissaat Naalakkersuisooqatigiit piaartumik suliniuteqassapput. Tamatumani eqqarsaatigineqassapputaaq aalisarsinnaanermut akuersissummik annaasaqanngikkaluarluni angallatitoqqaminnik nutaanik taarsiiniartut tapersorsorneqarnissaat.

Pisassat tuniniarneqarsinnaasut aalisarnermut akuersissuteqartuinnarnit pisiarineqarsinnaalerlutillu tuniniarneqarsinnaalissapput kiisalu avannaani ukiuunerani sikukkut aalisartoqartarnera immikkut pisassiisarnikkut aaqqissuussivigineqartassalluni.

Aalisakkat tunisassiarineqarsinnaasut nutaat atorluarneqassapput, aammalu aalisarfiusinnaasuni nutaani misileraatitsilluni aalisartitsisoqartassalluni, taakkunanilu pisat nunatsinni suliarineqartussanngorlugit tulaanneqartarnissaat aqutissiuunneqassaaq.

Nunatta avannaani sikusartumi qaammatini siullerni pingasuni pisassiissutit avataatigut immikkut qaleralinnik aalisartoqartalernissaa Naalakkersuisut sulissutiginiarpaat.

Piniarnermut allagartat akuersissutit kommuuninit ingerlanneqarsinnaalernissaat aqutissiuunneqassaaq.

Tunumi Tasiilap eqqaani Ittoqqortoormiinilu aalisarnermik inuussutissarsiuteqarneq immikkut pilersaarusiugaasumik siuarsarneqassaaq, aalisariuteqarnikkut tunitsiveqarnikkullu ineriartortitsiviusumik.

Aatsitassarsiorneq

Naalakkersuisooqatigiilersut isumaqatigiissutigaarput aatsitassarsiornermi atugassarititaasut patajaatsuullutik pitsaanerpaajusarnissaat sulissutigissallutigu, nunatta aatsitassarsiornikkut aningaasaliiffigineqartarnissaa orniginartooqqullugu.

Uranimik akulinnik aatsitassanik qummut killissarititaasumik Naalakkersuisooqatigiit Inatsisartunut aalajangiiffigisassamik siunnersuuteqassapput.

Inuit Ataqaatigiinnut aammalu Partii Naleqqamut qitiusutut isigineqarmat inuussutissarsiutit pio-reersut innarlerneqannginnissaat aammalu uranimik attueqqusinnngilluinnarnermik politikiminnik aalajangiussisimmata, aammalu Siumumut illuatungaani uranimik akulinnik paaanissamut periarfissamik ammatitsimmat, kiisalu tamanna inuit peqqissusaannut avatangiisi-nullu navianartorsiortitsinermik kinguneqassanngitsoq, taava Naalakkersuisooqatigiit isumaqatigiissutigaat apeqqut qaqinneqassasoq, tamanna siumut isigaluni ilaatigut uranimik akulinnik aammalu saffiugassanik qinngornilinnik paaasoqarnissaa siunertaralugu qinnuteqaatit nutaat pisariaqartilertippassuk. Naalakkersuisooqatigiit taamatut isumaqatigiissuteqarput, Kalaallit Nunaanni pissutsit amerlasoorpassuit peqatigiilluni aammalu suleqatigiilluni aatsaat qaangerneqarsinnaammata, aammalu illuatungeriit kissaatiginngimmassuk apeqqutit ataasiakkaat suleqatigiinnissamut aporfiunissaat.

Aatsitassarsiornikkut uuliasiornikkullu suliffeqarfissuit nunami maani ingerlatseqatigiiffiliorlutik inerisaaneranni, naalakkersuisooqatigiilersut isumaqatigiissutigaat nalilersussallugu Nunatta qanoq annertutigisumik piginneqataasarnissaa, tamatumani Nuna Oil A/S-ip piginneqataasussaatitaanerata (carried partner) qanoq annertutiginissaa ilanngullugu.

Nunani tamalaaneersunit inuttaqartumik aatsitassarsiorneq pillugu siunnersuisooqatigiinnik Naalakkersuisooqatigiit pilersitsinissaq suliarissallugu isumaqatigiissutigaat.

Maniitsup eqqaani aluminiumik aatsitsiviliortoqarnissaa Naalakkersuisooqatigiit tapersersorpaat.

Takornariaqarneq

Takorniaqarneq inuussutissarsiutit sukarsuit ilaattut ineriartortinneqartoq nunatta aningaasaqarneranut annertunerusumik isaatitsiviulernissaa Naalackersuisooqatigiit anguniarpaat:

Naalackersuisooqatigiit sulissutiginiarpaat takornariaqarnikkut ineriartortitsinissamut tunngavissat pilersinnissat. Nunap immikkoortuini tamani silaannakkut imaatigullu angallannikkut pisariaqartitat annertusarnissat aammalu inissiisarfeqarnikkut nunap immikkoortuini annertusaanissat.

Takornariartitsinerup iluani ilinniartitaanerit assigiinngitsut katersuunneqassaapput ineriartortinneqarlutillu.

Takornarissat nuna tamakkerlugu tikittartut unnuisartut amerlisarneqassapput.

Inuussutissalerisut, tunisassiortut inuussutissarsiortullu suliffeqarfiit takornariartitsinikkut iliuuserisaat ersarissarneqassapput.

Meeqqat atuarfiini allamiut oqaasiinik ilinniartitsineq nukittorsarneqassaaq, taamaalillutik unnuisarfiit, neriniartarfiit kiffartuussiviillu assigiinngitsut oqaatsitigut piginnaasaqarnerusunik sulisussaqaalerniassammata.

Taamatullu inuusuttut takornarianik sullissisartutut sulisarnissat annertusarneqassaaq.

Angallanneq

Nunatta ataatsimoortinneqarneranut angallanneq ataqatigiisitsisunngorlugu ukiorlu kaajallallugu ingerlalluarsinnaasunngorlugulu aqqissuunneqassaaq.

Angallanneq nunatsinni innuttaasunut inuussutissarsiornermullu iluaqutaasussanngorlugu aqqissuunneqassaaq, aammalu takornariartitsisarnerup inuussutissarsiortut ingerlallualernissaanut naapertuuttumik aqqissuunneqassalluni. Imaatigut angallannerup isumannaannerulernissaa anguniarlugu angallatit ikerasaaqqatigut angalasinnaaneranun periarfissaat annertusarneqassaaq.

Nunap immikkoortuisa angallannikkut kiffartuunneqarneranni sullissinissamik isumaqatigiisuteqartoqartassaaq, aammalu angallannermi sullissisut amigartooruteqarsinnaanerannut qularnaveeqqusiisoqartalissalluni.

Nunatsinni sanaartugassanut annernut sanaartornernik ingerlatsisussamut ingerlatseqatigiiffimmik A/S-imik pilersitsisoqassaaq, avataaniit aningaasalersuuteqarneq aallavigalugu sulisus-samik, tamatumani suliassat piviusunngortinneqartussat ukuupput:

- Qaqortup Narsallu akornanni mittarfissaq sananeqassaaq
- Tasiilami mittarfiliortoqassaaq
- Ilulissat mittarfiat tallineqassaaq
- Nuummi mittarfissualiortoqarnissaanut pilersaarutit ingerlatseqqinneqassapput.
- Qeqertarsuarmi, Qasigiannuani, Kangaatsiami, Narsami, Nanortalimmi Ittoqqortoormiinilu kiisalu inoqarfinni anginerumaani timmisartunut suluusalinnut ujaraaqqanik

qallikkanik mittarfiliortoqarnissaanut periarfissat mississoqqissaarneqassapput inuussutissarsiornikkut siuarsaanermut aammalu suliffisaqartitsiniarnermut aningaasaliissutit kiisalu suliffissaaleqisut sulilersinneqarnerisigut pilersinneqarsinnaasunngorlugit.

Kangerlussuup Narsarsuullu ingerlaannarnissaat qulakkeerniarlugu kommuunit peqatigalugit aaqiisoqassaaq.

Nunap immikkoortuini mittarfeqarfiit talittarfiillu nutarterneqassapput immikkoortortakkaartumik pilersaarutit naapertorlugit piviusunngortinneqassapput.

Kommunit suleqatigalugit sumiiffiit takornariat tikittagaat talittarfilersuinikkut perusuersartarfilersuinikkullu tikikkuminarsarneqassapput.

ICAO aqqutigalugu isertitat nunatsinnut tutsinneqartassapput aammalu Kalaallit Nunaanni silaannakkut angallannerup piorsarneqarneranut atorineqassallutik.

Niuerneq

Nunatta aalisakkanik niuerluarnermigut, aammalu tunisassiarineqartartut qaffannerisigut pitsaasumillu unammillersinnaassutsimigut avammut nioqqutigisartakkani annertusissavai.

Uuliap akinga appartinneqassaaq ingerlatseqatigiiffissuarmi KNI A/S-imi sinneqartoorutissatut siunertarineqartut appasinnerulersinnerisigut.

Kalaallit tunisassiaasa immikkuullarissuunerat allaalluinnartuunerallu pissutigalugit ineriartortinneqassapput avammullu nittarsaanneqartarnerat annertusarneqassalluni.

Nunatta inuussutissarsiutitigut avammut nittarsaanneqarnera avammullu tuniniaanerup annertusarnissaa aqqutissiuukkumallugu Kalaallit Nunaata Avammut Tuniniaanermut Siunnersuisoqatigiivnik pilersitsinissaaq Naalakkersuisooqatigiit isumaqatigiissutigaat.

Nunatsinni assartuinikkut akigitinneqartut unammillersinnaassuseqartut aqqutigalugit nunatta unammillersinnaassusaa qaffassarneqassaaq.

Nunat sanilerisavut nunallu annertunerusumik niueqatigissavagut.

Inuussutissarsiornermi inerisaaqqinneq, tassanilu pingaarnertut, avammut tunisassiornitta annertusartuarnissaa aammalu avataaniit tikisitsiortorneruatta annikillisaaffigineqarnissaanik qitiutitsisoq.

Nunatsinniit aalisakkanik avammut niuerneq toqqaannartumik nunarsuarmilu niueqatigiinnermi akit naapertorlugit tamakkiisumik ingerlanneqartalernissaa anguniarlugu, pissusiviusut qulaajaavigineqassapput.

Nunatta imartaani aalisagartassinneqartut tamarmik piunaffigineqartalissapput avammut tuniniaanermi, nunatsinniit niuerfinni akiusut naapertorlugit avammut tuniniaanertik ingerlattassagaat.

Nunalerineq

Kalaallit Nunaat neqimik, timmiaalunnik, naatitanik immunnillu tunisassianik imminut pilersortoq Naalakkersuisooqatigiit sulissutigerusuppaat siuarsarusullugulu.

Nunalerineq pillugu Ataatsimiititaliarsuup innersuussutaasa piviusunngortinneqarnissaannut aningaasaliisoqassaaq:

Nunalerinermut siunnersuisarfik nukittorsarneqassaaq.

Kalaallit Nunaata neqinik, timmissanik, naatitanik, manninnik immunnillu tunisassianik imminut pilersulernissaa pillugu periusissiamik pilersaarusiortoqassaaq. Tassanilu silaannaap kissatsikkiartornera naapertorlugulu nunatta sinnerani annertusaanissamik siunertalimmik.

INUII savaateqarfinnik nersutaatilinnillu qanimut suleqateqarluni tunisassiornermik aammalu nioqutissanik inerisaanermik ingerlatseqataassaaq.

Nunalerinerup ineriartortinneqarneranut uiggiullugu nunaateqarfinnut misigisassarsiortunik takornariartitsisarneq ineriartortinneqassaaq.

Timmiaateqarluni, minkiateqarluni terianniaateqarluniluunniit inuussutissarsiutitigut ingerlatsisoqarsinnaanersoq misissorneqassaaq.

Nukissiorneq

Naalakkersuisooqatigiilersut upperaata nunatsinni minguitsumik nukissiorsinnaanerput suli anner-toorujussuarmik ineriartortinneqarsinnaasoq, aammalu taamaalilluta nukimmik avammut tunisassiu-lersinnaanerput aqutissiuunneqarsinnaalluni. Taamaammat naalakkersuisooqatigiit tamanna pillugu misissueqqissaarnerit aallartinniarpaat.

Innaallagissamut, imermut kiassarnermullu akigitinneqartut nammaqatigiinneq naapertorlugulu naleqqussaavigineqarnissaat naalakkersuisooqatigiit suliarissavaat. Taamaaliornikkut nunatsinni ilaqutariinnut aningaasaqarniarnikkut tamatumani atugarisat naligiinnerulersinneqaqullugit.

Nunatsinni tamarmi tunisassiornerup annertusarneqarnissaa siunnerfigalugu, assigiiarneru-sumillu periarfissaqartitaanissaa qulakkeerumallugu suliffissuarnut innaallagissamut, imermut kiassarnermullu akigitinneqartut nuna tamakkerlugulu assigiissapput.

Aasianni, Qasigianguani, Maniitsumi, Paamiuni kiisalu Nanortalimmi erngup nukinganik nukissiorfinnik pilersitsinissaq aallartisarneqassaaq.

Eqqumiitsuliorneq kulturilu

Kulturikkut immikkuullarissuserput tunngavigalugu inuiattut kinaassutsitsinnik ersersitsisarpugut, taamaammat Naalakkersuisooqatigiit siuttuunermini kulturikkut ingerlatsineq suliaassallu pillugit nassuiaammik suliaqartitsinissaq siunniuppaat.

Kulturilerisut, eqqumiitsuliortut isiginnaartitsisartullu atugarisaat inerisaaffigineqassapput pitsanngorsaaffigineqarlutillu. Peqatigiiffiit soqutigisaqaqatigiiffiillu pitsaasumik suleqatigerusuppavut.

Eqqumiitsulianik nunatsinneersunik aammalu qangaaniit sulianik ilaarsilluni aningaasarsiortarneq akiorniarylugu piginnittussaanermut illersuisinnaalernissaq naalakkersuisooqatigiit aaqutissiuutis-savaa.

Filmiliortarnermut institutumik pilersitsisoqassaaq, taassumalu suliassaasa ilagissavaat aningaasa-liissutissanik ujarlerneq aammalu ilisimasaniq siaruarterineq kiisalu nunani allani filmiliortartunut attaveqarneq. Taassuma saniatigut filmiliat, animationit titartakkanillu filmiliat inerisarniarlugit avatangiisinik pilersitsisoqassaaq eqqumiitsuliortut katersuuffigisinnaasaannik.

Nipilersukkat erinarsuutillu nunatsinneersut nunani tamalaani aqqissuussinernut peqataasar-nissaannut Namminersorlutik Oqartussat tapiissuteqartassapput.

Atuakkat kalaallisut oqaasertallit naqiterneqartarnissaannut aningaasanik immikkoortitsiso-qassaaq.

Ilagiit

Naalakkersuisooqatigiit anguniarpaat kalaaleq timikkut tarnikkullu peqqissoq. Upperisaq innut-taasut nukittoqutigisarmassuk anersaakkut inuunerup nukittorsartuarnissaa pisariaqartinneqar-poq.

Oqaluffik inuiaqatigiinni anersaakkut sulinermi pingaarutilimmik inissisimassaaq.

Oqaluffiit atorfeqartitsinikkut naammaginantumik inuttaqartinneqassapput.

Upperisaq pillugu atuartitaaneq pingaartinneqartuassaaq.

Oqaluffimmi ajoqit pattattullu pisariaqartinneqartut atorfinitsinneqartassapput.

Timersorneq

Timersorneq inuunermit peqqinnerusumut aqquataavoq. Naalakkersuisooqatigiit ilisimaaraat timersorneq pinaveersaartitsinermit pingaarutilimmik inissisimasooq aammalu atuartitaanermit atorluarneqalernissaa suliniutigineqassaaq.

Inuit tamarmik peqataaffigisinnaasaat timersuutit tamanut ammasuunerat pissusissamisoorpoq, taakkulu illoqarfinni nunaqarfinnilu 200-it sinnerlugit inoqartuni timersortarfinni imaluunniit timersortarfeeqqani sammisarinissaannut sinaakkutissat pisariaqartinneqartut pilersinneqas-sapput.

Timersornikkut aqutsisut sungiusaasullu ataavartumik pikkorissartinneqarnissamut ilinniar-titaanissamullu neqeroorfigineqartassapput.

Timersortartut nunarput sinnerlugu unammisartut erfallasorput atorlugu unammisinnaassapput, aammalu timersornermut kattuffiit nunat tamalaat akornanni kattuffissuarni ilaasortanngorsinnaasariaqarput.

Ivigaasanik qallikkanik arsaattarfinnik pilersinitsinissamut aningaasanik immikkoortitsisoqassaaq, taakkulu kommunit suleqatigalugit pilersinneqassapput.

Timersortarfiit imminut pigisut aserfallassimasut Sanaartornermut Iluarsartuussinermullu Aningaasaateqarfimmut iluarsartuussinissamut atugassanik aningaasanik qinnuteqarsinnaalissapput.

Timersornermik ingerlatsisut unammersuarnernut peqataajartortarnerminni tamatumalu sania-tigut utoqqalinersiallit siusinaarlutillu sulisinnaajunnaarnersiutisiallit angallannermi akikillisaa-vigineqarsinnaanerata siunertaralugu sulisoqassaaq.

Qajartorneq, inuit pinnguaataat aammalu qimusserneq kulturikkut eriaqassatut illersugaas-sapput.

Silaannaap allanngoriartornera

Silaannaap allanngoriartornera aammalu uteqqiattumik imartatta kissarnerulertarnera periarfissa-nik nutaanik aammalu qaangerniagassanik malitseqarpoq:

Silaannaap allanngoriartornerata malitsigisai pitsaasut pitsaanngitsullu paasiniarneqassapput nalunaarsorneqarlutillu. Tamanna aallaavigalugu naalakkersuisooqatigiit ersarissumik nuna ta-makkerlugu anguniakkanik siunertalersuissapput. Tassunga atatillugu Parisimi silaannaap allan-ngoriartornera pillugu isumaqatigiissutip peqataaffiginissaanut pitsaaqutit ajoqtillu peqqissaar-tumik nalilersuiffigineqassapput.

Nunap qeriuannartup killinga avannarpariartorpoq, tamannalu sanaartukkanut illuutinullu annertuumik sunniuteqarpoq. Tamassuma sunniutai misissortuassapput aammalu allannguutit iliuuseqarfigineqarnissaat sillimaffigineqartariaqarluni.

Silaannaap, pinngortitap avatangiisillu ilisimatusarfigineqarnerini suliat katersortariaqarput, taamaalilluni silaannaap allanngoriartorneranik ilisimatusarnermi nunarput suli pingaarute-qarnerusumik inissisimalerniassammata. Tamassumalu malitsigisaanik aamma uumassusilinnik atuinermi periarfissat nutaat eqqummaariffigineqarnerulerniassammata.

Avannaani piniartut qangatuut inuuniarnerat suli ajornakusuuleriartorpoq, taamaattumik sikuniartarnerata sivilisinerulersimasup nalorninarnerulersimasullu nalaani suliffissaqartitsiniar-nikkut immikkut qanoq iliuuseqartoqartarnissaanut periarfissat misissoqqissaarneqassapput.

Piniarneq

Silaannaap allanngoriartornerata aammalu teknikkikkut ineriartornerup malitsigisaanik piniarner-mik inuussutissarsiuteqarneq tatineqariartorpoq, ingammik qangatuut piniariaaseq ukiuni mak-kunani annertuumik eqqorneqarami.

Nunatta immikkoortuini najugaqartut pisariaqartitaat aallaavigalugit piniakkatigut pisassiisoqartassaaq.

Qangaaniit ileqqut malillugit piniarneq Kalaallit Nunaanni inuussutissarsiutitut illersorneqartariaqarpoq. Piniariaasitoqqat attanneqartuarnissaat tapersersorneqarnissaallu pisariaqarlunnarpoq.

Nunatsinni ammeriveqarnerup aaqqiivigineqarnissaa naalackersuisooqatigiit misissoqqissaarniarpaat. Ilaatigut puisip amiisa aningaasarsiutaanerisa qaffassarneqarnissaat siunertaralugu.

Piujannartitsinissamik periuseqarneq nunatsinneersuuvoq, tassami piniarnermi piujannartitsinissamik inatsisitigut aalajangersaaneq siullersaat Thulemi pivoq, tamannalu periuseqnersorneqartariaqarpoq siaruarterneqartariaqarlunilu.

Qilalukkanik qernertanik, qaqqortanik, nannunik aavernillu piniariaasitoqqat malillugit piniarneq eqqarsaatigalugu Qaanaami, Upernavimmi, Tasiilami Ittoqqortoormiinilu pisariaqartitsineq naapertorlugu, aalajangersimasunik pisassiisoqartalernissaa Naalackersuisooqatigiit anguniarpaat.

Qilaluarniartarnermi inatsisitigut maleruagassat naleqqussarneqassapput, piniartut aningaasarsiornermikkut iluaquserneqarsinnaanerit pingaartillugu.

Pisassanik siunnersuineri uumasunik ilisimatuut atuisullu ilisimasaat naligiisillugit piniagassanik pisassiisoqartassaaq.

Avatangiisit

Avatangiisitta minguitsuunissaa pinngortitalu paarilluarnissaa akisussaaffigaarput.

Nunarput nukimmik mingutsitsinngitsumik ukioq 2024 nallertinnagu tamakkiisumik imminut pilersulernissaa sulissutigineqassaaq.

Innuttaasut tamarmik pisussaapput avatangiisitta mingutsaaliorneqarnissaanut. Meerartavut avatangiisitta pinngortitalu paarsilluarnissaanik perorsartariaqarpavut. Saligaatsuutitsinissaq pillugu paasititsiniaasarnertit ataavartumik aaqjissuunneqartassapput.

Eqqagassalerineq pillugu iliuuseqarnissamut pilersaarut timitalerneqartariaqarpoq, taamatullu aamma eqqagassat immikkoortiterneqartarnerat, eqqagassat navianartut isumagineqartarnerat, ikuallaasarneq atoqqiisarnertu pillugit kommunit annertunerusumik suleqatigineqartariaqarput.

Biilit innaallagiatortut hybridillu atornerqarnerat annertusarniarlugu akileraartarnikkut akitsuusiarnikkullu pitsaasumik akileraarusersuisariaqarpugut akitsuusersuisariaqarlutalu.

Pisortat suliffeqarfiini tamani atortulersuutit nukimmik atuinikitsut suugaluartut tamatigut atornerqartassapput.

Kommunit

Nunatta imminut ataqatigiittumik sullinneqarnera ineriartorneralu inuttaasullu qanimut oqartussaaqataanerat nukittorsarneqassapput. Tamannalu pillugu suleqqinnissaq Naalackersuisooqatigiit isumaqatigiissutigaat.

Kommunit kattussuunneqarnerat pillugu suliaq naammassillugu suliarineqassaaq, taamaalilluni kommunini aaqqissuusseqqinneq inuit qanimut oqartussaaqataanerat nutaamik uterteqqinneqarluni. Taassuma saniatigut atsioqatigiittut kommuninut kaammattuutigissavaat najukkami siunnersuisooqatigiinnik imaluunniit assingusumik oqalliffinnik pilersitsisoqarnissaa aammalu nunaqarfinni aqutsisut aalajangiisinnaassusaat annertusarlugu kiisalu aningaasatigut oqartussaaffeqarnerat inatsisitigut qulakkeerlugu.

Tamatumani Naalackersuisooqatigiit siunniuppaat:

- Innuttaasut pisussaaffiliingikkaluartumik taasereernerat ataqqillugu Qaasuitsup Kommuniata avinneqarnissaa sulissutigineqassaaq naammassineqarlunilu, taassumallu saniatigut kommuningortussat aningaasatigut attanneqarsinnaasumik aaqqiivigineqarnissaat qulakkeerneqarluni.

Nunaqarfiit

Nunaqarfiit nunatta nerisassaqarnikkut peqqumaateqarfigai.

Nunaqarfiit inuiaqatigiinni pingaarutilerujussuupput, tassaagamik nunatta ataatsimoorneranut nakooqutaasut.

Nunaqarfiit nunatta ineriartortinneqarnerani aalajangeeqataasinnaallutik inissisimasariaqarput, taamaattumik nunaqarfinni aqutsisut aalajangiisinnaassuseqarnissaat pisariaqarpoq.

Nunaqarfiit pillugit suliassat Namminersorlutik Oqartussat ataanni pisorta qarfirmut ataatsimut katersuunneqassapput.

Nunaqarfinni tunitsiviit nunaqarfiit aningaasarsiorsinnaanerannut pingaaruteqarluinnarput, taamaattumik tunitsiviit sapinngisamik imminut akilersinnaasumik ingerlanissaat qulakkeerniarlugu kalaaliminernik tunisassiornermut sullissinermut isumaqatigiissuteqartarnissaq aqqutissiuunneqassaaq.

Nunaqarfiit ineriartortinneqarnissaat pillugu suliniutit aalajangiusimaneqassapput, taamaattumik pisariaqarpoq immikkoortortakkaartumik pilersaarutit pisariaqartinneqartut mianerinnilluni ingerlanneqarnissaat, inuussutissarsiornikkut suliffeqarnikkullu ineriartortitsinissaq aamma eqqarsaatigalugu.

Nunaqarfinni anartarfeqarnikkut kuuffeqarnikkullu pissutsit nutarterneqassapput aammalu najukkani pisariaqartitat naapertorlugit nutaamik aaqqissuussisoqarluni.

Naalackersuisooqatigiit nunaqarfinni isorliunerusunilu nukissiuutit mingutsitsinngitsut atorlugit inuussutissarsiornikkut siuarsaaniarput, taassumalu saniatigut nunap immikkoortuinik aallaaveqartumik ineriartortitsillutik.

Nunaqarfiit namminerisamik aalajangersaasinnaanerat annertusassaaq, aammalu kommunit kattussuunneqarnerat pillugu suliap nalilersorneqarnerani nunaqarfiit sunniuteqarlutik akuunissaat pisariaqarpoq, taamatullu nunaqarfiit siunissaat pillugu annertuumik aalajangeeqa-taasinnaassuseqarnissaat pisariaqarluni.

Nunaqarfiit peqatigiiffiat KANUNUPE politikikkut nukittuumik inissisimassaaq.

Peqqinnissaq

Inuiaqatigiit peqqissut pilersinniarlugit suliniutit Naalackersuisooqatigiit ingerlatissavaat inuit ataasiakkaat peqqinnissaat aallaavigalugu.

Inuit tamarmik Peqqinnissaqarfimmiit sukkasuumik, unneqqarissumik ataqqinnittumillu sullin-neqassapput. Kinaluunniit nappaateqarnerluni paasisaqassaaq misissortinnerminiit piffissap aala-jangersimasup ingerlareerneratigut, taamatullu suliaritinnissamik piffissap aalajangersimasup iluani neqeroorfigineqassalluni.

Peqqinnissaqarfiup nunap immikkoortuinut agguataarineq nutaamik nalilersuiffigineqassaaq.

Kræftip akiorneqarnissaa pillugu pilersaarut ingerlateqqinneqassaaq.

Peqqissaavinni sullissineq pitsaanerulersinneqassaaq pinartoqartillugu saaffiginninnerit aammalu pisut inuunermik navianartorsiorfiusut pitsaanerusunik sillimaffigineqalernerisigut.

Arnat naartusut najugaqarfimmini illoqarfik qaninnerpaaq erniartorfigisinnaasariaqarpaat.

Nakorsat immikkut ilinniagaqarsimasut angalatittarnerisigut minnerpaamik ukiumut ataasiarluni illoqarfinni tamani nunaqarfinnilu suliaritittussat isumagineqartassapput.

Nappaatit tuniluuttartut kiisalu imigassaaq, ikiaroornartoq tupalu pillugit paasititsiniaanerit pinaveersaartitsinerillu meeqqanut inuusuttuaqqanullu siunnerfeqartut ingerlanneqartuassapput.

Peqqinnissaqarfimmi aningaasartuutit angusaqarnerulersitsinissaaq siunertaralugu sukumiisumik misissuiffigineqassapput.

Suliaritinniarlutik utaaqisut ikilisarneqarnissaannik suliniuteqarneq nanginneqassaaq.

Dronning Ingridip Napparsimavissuani meeqqanut uninngavimmik pilersitsisoqassaaq.

Avalallutik katsorsartikkiartortartut ilaquuttaminnik qanigisaminnik peqateqarnissamik pisaria-qartitsisut ingiallorteqarsinnaanerit periarfissaalissaaq.

Imminut toquttarneq akiorniarlugu paasititsiniaaneq annertusarneqassaaq aammalu oqallinnerit oqaloqateqartarnerillu aqqutigalugit pinaveersaartinneqassalluni.

Atornerluinermik nappaatillit ajornartorsiuteqartullu akeqanngitsumik katsorsartinneqartassapput.

Inuit kinguaassiutitigut atornerlunneqarsimasut pillugit immikkut iliuusissat ingerlanneqassapput.

Ineqarneq sanaartornerlu

Naalackersuisooqatigiit ineqarneq pillugu iluarsartuussineq ingerlanniarpaat, taannalu anner-tunerusumik naligiisitsisoqalernissaanik aallaaveqassaaq aammalu isertitakitsut akunnattumillu isertitaqartunut imminut inissaqarniarnikkut pilersorsinnaanerup annertusarneqarnissaa pi-ngaarnertut anguniagaralugu.

Ernianut tamakkiisumik ilanngaateqartarneq ingerlaannassaaq.

20-20-60 atorlugu taarsigassarsititsisarneq ingerlaannassaaq.

BSU aqputigalugu illuutillit namminerlu illuutillit illutiminnik iluarsaassinissaminnut atatillugu tapiiffiqineqarsinnaanerup iluarsaasseqqinnermi qummut killiliussat nutaamik nalilerneqassapput.

Illoqarfinni nunaqarfinnilu realkredit aqputigalugu periarfissaqarfiunngitsuni nammineq illulior-niartut periarfissaat annertunerpaatikmallugu realkreditinut assingusumik aningaasaateqar-filiorsinnaaneq misissorneqassaaq.

Sanaartornerup nakkutigineqarnera sukaterneqassaaq.

Sanaartugassanik suliariumannittussarsiuussisarneq pillugu inatsisit attuumassuteqartut tamarmik nutarteriffiqineqassapput, taamaaliornikkut suliffeqarfiit minnerusut sanaartornermi peqataal-luaqqilernissaat anguneqarsinnaaqqullugu.

Nunatsinni inuussutissarsiornikkut ingerlataqartunut pitsaanerusumik sinaakkusiiniarlutik Naa-lackersuisooqatigiit Kalaallit Nunaanni Inuussutissarsiutinut Qularnaveeqqusiisarnermut Ani-ngaasaateqarfimmik pilersitsinikkut unammillersinnaaneq qaffassarniarneqarpoq. Aningaa-saateqarfik Namminersorlutik Oqartussanit pilersinneqassaaq ingerlanneqarlunilu, aningaa-saateqarfik namminersortunut ataasiakkaanut ingerlatseqatigiiffinnullu periarfissiilluartumik aaqqinneqassaaq.

Naalackersuisooqatigiit anguniarpaat nunatsinni sumiikkaluaraanniluunniit ataavartumik ukioq kaajallallugu sanaartornerup ingerlanissaa. Tamannalu aaqqiiviginiarlugu iliuusit malittarisas-siuussinerillu suliarineqarnissaat piviusunngortissallugu.

Nunaqarfinni isorliunerusunilu nammineq illussanik sanaartornissamut aningaasaliisoqassaaq aaqissuussinerlu nutarterneqarluni.

Sanaartornermut iluarsartuussinermullu Aningaasaateqarfimmi aningaasaliissutit Inatsisartut sanaartornermut illuliornermullu aalajangigaat naapertorlugit sulisinneqassapput, aammalu aningaasaateqarfimmi suliassat ataavartumik ingerlanissaat qulakkeerniarlugu missingersuu-siortarnermut inatsit allanngortinneqassaaq, taamaalilluni sanaartorneq ataavartuq angune-

qassamat. Inatsimmik allanngortitsinikkut aamma immikkut pisoqartillugu pingaarnersiuinikkut allanngortitsisoqarsinnaanissaa aqutissiuunneqassaaq.

Sanaartornermi atortut avataaniit tikisinneqartartut annikillisinniarlugit, nunatta pissaritaanik atorluanaanerunikkut inerisaasoqarnissaa naalakkersuisooqatigiit sulissutigissavaat.

Isumaginninneq

Inuiaat nukittuut imminnut pilersorlutillu akisussaaqataasut – pilersinniarlugit Naalakkersuisooqatigiit sulissapput. Inuiaqatigiit ineriartoqqinnissaannut siuariartornissaannullu atugarissaarneq tunngaviussaaq. Inuiaqatigiit atugarissaarnikkut nukittuumik inissisimasut ilaqutariit tunngavissaraat, ikiorneqarnissamillu pisariaqartitsisut ikiorneqarnissaat qulakkeertariaqarluni. Inuiaqatigiit atugarissaarnerat pitsaasoq tassaavoq peqqinnissamut, ilinniarnissamut suliffeqarnissamullu periarfissaarneq, sumi inissisimaneq apeqqutaatinnagu.

Naalakkersuisooqatigiit innarluutilinnut ilinniartitaanikkut neqeroorutininik saqqummiussissapput.

Naalakkersuisooqatigiit inunnik isumaginninnikkut sullissinerit ikiorsiisarnerrillu naatsorsueriaatsit naleqassutsimik aallaaveqartut sakkugalugit ingerlanniarpaat, ingerlaavartumik aaqqinneqartartussat naleqqussarneqartassapput. Taamaaliornikkut nunatsinni sullinneqartunut tamanut sullissineq pitsaanerpaaq naligiinnerusorlu anguneqassaaq, tamannalu ineriartortinneqassaaq Namminersorlutik Oqartussat kommunillu suleqatigiinnerisigut. Isumaginninnikkut sullissineq immiut ikiornissamik aallaaveqartillugu ingerlanneqassaaq.

Naalakkersuisooqatigiit sulissutigissavaat inunnik sullissineri sulisorisat tamarmik ataavartumik pikkorissartinneqartarnissaat. Taamatuttaaq inunnik sullissineri ilisimasanik katersuiffik kommunini sullissiniarnermi iluaqutaasussaq Naalakkersuisooqatigiit pilersinniarpaat. Isumaginneqarnissamik pisariaqartitsisut imminnut ikiorsinnaanngortillugit ikiorserneqartarnissaat sulissutigineqassaaq.

Isumaginninnermi sullissisut suliaasa amerlanerpaaffilerneqarnissaat aalajangersarneqassaaq.

Suliniarnermi ilaatigut makkua aqutaassapput:

- Pisortanit ikiorsiissutit, suliffissaaleqineri pisartakkat, napparsimanerme ikorsiissutit, meeqqanut tapit, ineqarnermut tapit tamakkiisumik aaqqissuuteqqinnerisigut.
- Suliffissaaleqisut piginnaanngorsaqqinneqassapput inuiaqatigiinni akuunissaat pisariaqarlunnarmat. Ikorsiissutit piumasaaqaatitaqalissapput, inuup nammineerluni iliuuseqartarnissaa piumasaaqaataassaaq, ilaatigut soorlu katsorsartinnissamik – maannakkumiit annertunerusumik piumasaaqateqartarnissaaq pingaaruteqarpoq. Ikorsiissutit ilaat, soorlu meeqqanut tapeqartitsisarneq ilaqutariinnut naapertuunerusumik ingerlanneqartarnissaa periarfissiissutaasalissaaq.
- Kinguaasiutitigut atornerlunneqarsimagaanni tarnip nakorsaanit ikorserneqarnissamik neqerooruteqartarneq annertusarneqassaaq.
- Inuttut nukittorsarneqarnissaaq pisariaqarpat aamma tamanna neqeroorutaasassaaq.
- Innuttaasut sulisinnaasut suliffissaaleqineri uninngaannalersimasut sulilersinneqarnissaat ilinniagaqalersinneqarnissaalluunniit siunertaralugu kommunit suleqatigalugit ataqatigiissaakkamik periaasissamik suliaqartoqassaaq.

Ilaqutariit – Meeqqat

Naalakkersuisooqatigiit isumaqarput innuttaaqataasoq kinaluunniit pisussaasoq ilaqtaminut, qanigisaminut nunaqqatiminullu inooqataanermini timikkut tarnikkullu inuunerup atoruminartuunissaanut suleqataanikkut akisussaaqataasoq.

Naalakkersuisooqatigiit pilersikkusuppaat inuiaat nukittuut, imminnut pilersorlutillu akisussaaqataasut. Naalakkersuisooqatigiillu isumaqarput inuiaqatigiit ineriartoqqinnissaannut siuariartornissaannullu atugarissaarneq tunngaviuinnassasoq.

Naalakkersuisooqatigiit isumaqarput inuiaqatigiit atugarissaarnikkut nukittuumik inissisimasut ilaqtariit tunngavissaraat, ikiorneqarnissamillu pisariaqartitsisut ikiorneqarnissaat qulakkeertariaqarluni.

Ilaqtariit inuiaqatigiinni qitiummata. Ilaqtariit susassareqatigiinnerlu pillugit politikissamik nutaamik pilersitsisoqassasoq Naalakkersuisooqatigiit isumaqatigiipput.

Naalakkersuisooqatigiit anguniarpaat meeqqat, inuusuttullu toqqissisimasut, imminnut tatigisut inoqatiminnik ataqqinnittut, peqqissut, tarnikkut timikkullu nukittuut kinaassutsiminnillu ilisarisimannittut pilersinnissaat. Ilaqtariiususeq suliffeqarnerlu oqimaaqatigiittumik aallavigalugit.

Inatsisartut, Naalakkersuisut kommuunillu ukiuni taakkunani suliniutissat piviusunngortinnissaannut suleriaasissaminnut pilersaarusiussapput, siunertanullu aningaasaliissuteqartuqarnissaa qulakkeerneqassalluni.

Ilaqtariit meerartallit angerlarsimaffimmi, suliffimmi sunngiffimmilu pitsaanerpaamik atugassaqartinneqartariaqarput. Taamaattumik ilaqtariit meerartallit sutigut tamatigut inuiaqatigiit aningaasatigut sinaakkusersuineranni atugassaqartinneqassapput.

Iliuserineqartunut tapiliullugu naalakkersuisooqatigiit nuna tamakkerlugu meeqqat inuusuttuaqqallu pillugit iliuuserisassanik isumaginninnerup tungaatigut pilersaarusiussapput.

Meeqqat angerlarsimaffiup avataanut inissinneqartartut amerlassusaat malunnaatilimmik annikillissapput, ukiut qulit qaangiuppata annerpaamik 2,5%-nngorlugit. Ilaatigut Ilaqtariinni sullissiviit ineriartorteqqillugit angerlarsimaffinni siunnersuisarnertigut, taakkunanilu tarnip pissusaanik ilisimasalinnik amerlanerusunik atorfinitsitsinikkut.

Tamakkua saniatigut naalakkersuisooqatigiit MIO-mut ilisimasanik katersinermut atorneqartussanik aningaasaliissutissanik ilassuteqassapput.

Utoqqaat

Utoqqaat pillugit politikimi inuup naleqassusia aallaaviusaaq - tamatumalu siunertaasa ilagaat toqqissisimaneq pitsaassuserlu. Nunatsini utoqqanngorluni inooqataaneq nuannersuussaaq. Utoqqaat illoqarnikkut sussassareqatigiinnikkut aningaasaqarniarnikkullu atugarissaartut inuia-

qatigiinni suleqataajuarnissamut piumassuseqassapput, taamaattumik utoqqaat ajunngitsunik atugaqarnissaat periarfissaqartitaanissaallu naalakkersuisooqatigiit sulissutigissavaat.

Utoqqalinersiutit pillugit iluarsaaqqittoqarsimamut naalakkersuisooqatigiit naqissuserpaat.

Tunngaviumik pensionisiat kikkunnut tamanut atuuppoq, aapparisaq isertitaanut attuumassuteqanngitsoq eqqunneqareerlunilu.

Utoqqaat utoqqalinersiaminnik ilanngartuiffiqeqaratik saniatigut isertitaqarsinnaanissa-minnut periarfissaat annertusarneqassapput.

Angerlarsimaffimmi ikiorteqarnermi atuisut akiliisarunnaassapput.

Innarluutillit

Inuit ersitsumik ersinngitsumillu innarluutillit pisinnaatitaaffii pillugit Naalagaaffiit Peqatigiit 13. december 2006-mi isumaqatigiissutaat aallavigalugu Inatsisartut inatsiseqarnissaat anguneqassaaq.

Innarluutillit ilinniartitaanikkut neqeroorfigineqartarnissaat naalakkersuisooqatigiit suliarissavaat.

Nunatsinni innarluutillit ikiorserneqartarfii isumagineqartarfiilu pitsanngorsarneqassapput atukkanut naleqqussarlugit, taamatullu nunatsinni innarluutilinnut najugaqarfiit pisariaqartitsinermut naapertuuttut sulisoqarnikkullu naleqqussaaffiusut sapinngisamik pitsaanerpaamik ingerlanneqassapput.

Innarluutillit sulisinnaasut sulerusuttullu isumagineqartassapput taakkununga suliffiit naleqquttut atorluarnerisigut. Innarluutilinnut suliffissat nunaqarfinni illoqarfinnilu pisariaqartitsineq naapertorlugu piorsarneqassapput.

Inuiaqatigiit avatangiisillu piareersarneqassapput innarluutillit akuusinnaangortillugit, soorlu qamutiniq assakaasulinnik atuisut suliffeqarfinnut, pisortat kommunillu allaffeqarfiinut, aningaaserivinnut allanullu isersinnaangortillugit.

Siusinaartumik pensionisiat pillugit iluarsaaqqinneq

Inuiaqatigiinni pisinnaasut tamarmik sulissallutik inuiaqatigiinnut iluaqutaanissaat pingaaruteqarpoq. Innuttaasut killilimmik sulisinnaassusillit siusinaartumik pensionisialittut inissiinarneqartannginnissaat pisariaqarpoq, akerlianillu uagut taakku piginnaasaat aallaavigalugit, inuiaqatigiinni isiginnaartuinnaajunnaartillugit peqataalernissaat aallaavigisariaqarparput.

Innuttaasumut angerlarsimalluni issiaarusaaginnarnermit sulisartutut inuuneq pitsaaneruvoq. Ullormi susassaarluni makinneq innuttaasunut amerlanerpaanut pingaarnerpaavoq, soorluttaaq iluaqutaalluni misigisimaneq pingaarnerpaasartoq. Iluaqutaanermik misigineq siusinaartumik pensionisierisartumut namminermit, taassumalu meeraanut, inuiaqatigiinnullumi pingaarnerpaajuvoq. Taamaammatt siusinaartumik pensionisierisartumut nutarterneqarnissaa pisariaqarpoq.

Pisortani allaffissornikkut ingerlatsineq

Pisortani allaffissornikkut ingerlatsinermit pisariillisaaneq ingerlaqqissaaq, tassanilu innuttaasut kiffartuunneqarnerat pitsanngorsarneqassaaq assigiiaarnerulerlunilu:

Suleriaatsit pitsanngorsassapput, taamaasilluni suliat sunniutaat uuttortarneqarsinnaalerlutik. Digitalinngorsaaneq aqqutigalugu suleriaatsit, aalajangiinerit aammalu innuttaasut kiffartuunneqarnerat sapinngisamik paasiuminartumik pisariitsumillu ingerlanneqassaaq. Sullissivik.gl sulii annertunerusumik ineriartortinneqassaaq.

Namminersorlutik Oqartussaniit kommuninut suliasat akisussaaffiillu amerlanerusut tunniunneqassapput, soorunami aningaasartaat malinaatillugit, assersuutigalugu piniarnermut allagartanik tunniussisarneq.

Pisortani allaffissornikkut ingerlatsinermit aningaasartuutikillisaasoqassaaq innaallagissamik, imermik kiassarnermillu annikinnerusumik atuinikkut.

Namminersorlutik Oqartussani aammalu kommunini sullissineq sukkanerusoq anguneqartariaqarpoq, assersuutigalugu sanaartugassat, nunaminertat aammalu najukkani pilersaarusiortarneq eqqarsaatigalugit.

Aningaasartuutikillisaalluni angalasarnerit avataaniillu siunnersortinik atuisarnerit annikillisarneqassapput.

Pisortat ingerlatsiviini pissaanermik atornerluisoqartannginnissaa pillugu inatsisiliortoqassaaq, qinikkanut atorfilinnullu kiisalu pisortat pigisaannut ingelatseqatigiiffinnut atuuttussamik.

Pisortanut akiitsunik akiliisitsiniartarneq sukateriffigineqassaaq taamaalilluni sapinngisamik Kalaallit Nunaata BNP-ia 5 % ataallugu akiitsoqarnerup inissisimasarnissaa siunertaralugu.

Nunanut allanut tunngassuteqartut

Naalackersuisooqatigiit isumaqarput Nunatta nunani allani soqutigisani erseqqarissumik, tunniusimasumik akuunikkut illersortassagai tamaviaarutigisarlugillu:

Nunarput nammineerluni nunatta soqutigisai pillugit nunanut allanut isumaqatigiinniartitaasalernissaa anguniarlugu danskit naalackersuisui isumaqatiginiarfineqassapput.

Naalackersuisooqatigiit isumaqatigiissutigaat Pituffik pillugu piaartumik qulaajaasoqarnissaa aallartinneqassasoq, aamma danskit naalackersuisuinut Nunatta soqutigisai pillugit nutaamik isumaqatiginniarnerit aallartinneqassasut.

EU-mik suleqateqarneq niuernikkut, inuussutissatigut, aatsitassarsiornikkut aammalu nukissiornikkut annertusarneqassaaq.

Nunarput nunani sanilerisamini qaninnerni aammalu assigiinngitsutigut iluaqutigineqarsinnaasunik niueqatigisatsinnik attaveqarfinnik aallartitaqarfeqassaaq.

Nuna allamiut aammalu nuuttut pillugit inatsiliorsinnaaneq qinigaaffiup ingerlanerani tiguneqassaaq.

Nunatta nunatsinni silaannakkut angallannermut oqartussaaffik 2018 sioqqullugu tigussavaa.

Nunatta imartaasa illersorneqarnissaannut nunarput akuulluni suleqataassaaq.

Nunatta imartaani umiarsuakkut angalanissamut piunasaqaatit sukannenerusut atuutsinneqalernissaat Naalakkersuisooqatigiit suliarisavaat.

Naggasiut

Siuliani isumaqatigiissutigalugit taaneqartut saniatigut partiit naalakkersuisooqatigiilersut isumaqatigiissutigaaq naalakkersuisooqarfikkaartumik sulinissamut toqqammavissanik isumaqatigiissuteqassallutik, isumaqatigiissummut matumunnga tapiliussatut ilanngunneqartussamik. Tamannalu naalakkersuisooqatigiit sulilereerneramik kingorna peqqissaarullugu naammassissavaat.

Taamatuttaaq Naalakkersuisooqarfiit agguartaarnerat pillugu partiit suleqatigiilersut akornanni isumaqatigiissut matumani ilanngussatut ilanngunneqarpoq.

Taamatut isumaqatigiissuteqarlutik partiit Naalakkersuisooqatigiilersut matumuuna atsioqatigiipput

Nuuk, ulloq 27. oktober 2016.



Kim Kielsen
Siumut



Sara Olsvig
Inuit Ataqatigiit



Hans Enoksen
Partii Naleraq